

Nunat Aqqinik Aalajangiisartut marsip ulluisa 13-ianni 2002, nal. 15.00
Oqaasileriffimmi ataatsimiinnerannit imaqarniliaq.

Peqataasut: Carl Chr. Olsen, Karl Elias Olsen, Mariane Petersen, Stephen Heilmann.

Kelly Berthelsen pikkorissaqataagami peqataanngilaq.

Allatsigalugu Pia N. Knudsen.

Oqaluuserisassat:

1. Oqaluuserisassat akuerisassanngorlugit saqqummiunnerat.
2. Kingullermik ataatsimiinnermit imaqarniliap akuerisassanngorlugu saqqummiunnera.
3. Ilisimatitsissutit.
4. "The return to the top of the World expedition".
5. Nunat aqqisa atuarfinni ilinniartitsissutigineqarnissaat (KEO).
6. Tusagassiuutit atornissaannut pilersaarutit (CCO).
7. Nunat aqqi ataasiakkaat (KEO).
8. Taasariaqartut allat.


-1 pillugu-

Oqaluuserisassat akuerineqarput.

-2 pillugu-

Imaqarniliaq akuerineqarpoq.

-3 pillugu-



CCO: Pia N. Knudsen marsip 11-ianni 2002 allaffimmi fuldmægtigit aallartittoq ilisaritippaa.

-4 pillugu-

CCO: Nunani avannarpasinnerpaani qaqqat portunersaat "John Denver Peak"-imik atserneqassasoq siunnersuutigineqarsimasoq unnerpaa.

John Denver-imik atserneqarnissaa naleqqutinngitsutut oqaatigaa, inunnik taaguutinilluunniit Kalaallit Nunaannut attuumassuteqanngitsunik atsiisanninnissaq NAA-p aalajangersaasarnermi malitassaaniippoq.

MP: Kalaallit Nunaannut tunngassutillit atsiunneqartarnissaannut siunertaq isumaqatigaa. MP isumaqarpoq siulivut, oqaluttuaativullu nunatsinnut tunngassutillit nunanut qaqqanullu atsiunneqartassasut.


MP: Qaqqaq timaaniimmat Tunermik atsissallugu piukkuppaa. Qangarsuaq Tunit timaani najugaqarsimanerintut eqqaassutissatut nunatsinnullu attuumassuteqarnera pissutigalugu ataasersiutinngorlugu atsernissaa siunnersuutigaa.

Nunat Aqqinik aalajangiisartut qaqqaq nunani avannarlerni portunerpaaq John Denverimik atsernagu "Tuneq-mik" atserneqassasoq aalajangerpaat.

-5 pillugu-

KEO: Meeqqat atuarfianni Kalaallit Nunaanni nunat aqqi pillugit *Atuarfitsialak* qanoq pilersaaruteqarnerisooq KEO-p paasiniaaffigisimavaa.

KEO-p meeqqat atuarfianni Kalaallit Nunaanni nunat aqqisa sammineqarnerulernissaat *Atuarfitsialammi* siulittaasumut siunnersuutigimmagu taanna siunnersuummut soqutiginninnerarpaa.



SH: Meeqqat atuarfianni Kalaallit Nunaanni nunat aqqinik ilinniartitsisalernissaq piunasaqaataalissappat suliarilluakkamik pilersaarusiorkuakkamillu ingerlanneqartariaqartoq SH oqarpoq.

MP: Meeqqat atuagassaannik taakkununga piukkunnarsakkanik atuakkiornissaq siunnersuutigaa. Atuakkat nunat aqqinik imaqarnissaat, assiliartaqarnissaat aammalu tamanit paasineqarsinnaasunngorlugu sananeqarnissaa MP-p siunnersuutigaa.


CCO: Meeqqat atuarfianni Kalaallit Nunaanni illoqarfiit nunaqarfillu pinngitsoorani ilinniagassatut læseplanimut ilanngullugit atuartitsissutigineqalernissaat CCO-p siunnersuutigaa. Kalaallit Nunaanni nunat aqqi soqutiginninneq aallaavigalugu ilinniarneqarsinnaanerarpai, taakkulu meeqqat soqutiginninnerat tungavigalugu ilangunneqarsinnaaneri CCO-p ammaffigaa.

-6 pillugu-

CCO: Oqaasiliortut siornatigut isumaqatigiissutigisimavaat tusagassiuutitigut saqquminerulernissaq.

Nittartakkap suliarineqarnerata amigaateqarnera, aqqissuuteqqinnissaalu pisutigalugit massakkorpiaq saqqummersitsisinnaaneq ajornarallartoq CCO-p oqaatigaa.

SH: Isiginnaagassiutit atorlugit saqquminerulernissaq SH-p kaammattuutigaa. Nunat aqqisa pineqartut sumiinnerinut nassuiaatit, isiginnaajutigalugit malinnaaffigineqarsinnaaneri ajornakusuunnginnerusut isiginnaartunullu paasiuminarnerusut SH-p oqaatigaa.



MP: Tusagassiuutit assigiinngitsut tamaasa atorlugit saqquminerulernissaq siunnersuutigaa.

Utoqqaat tusagassiuutitigut nunat aqqinik nassuiaanermi tusarnaarlutik nuannarisarmassuk taakkuttaaq puigorneqannginnissaat MP-p eqqaasissutigaa.

SH: Tusagassiuutitigut saqquminerulernissamut atatillugu Nunat Aqqinik Aalajangiisartut tusagassiortut atortussaannik piareersaasarnissaat SH-p siunnersuutigaa. Nunat assingi assigisaallu atortussatut assersuutigineqarsinnaasut SH-p taakkartorpai.


-7 pillugu-

KEO: Sermitsiap Ersaa ilumut taama ateqavinnersoq paasiniaasimavoq, aperiisaatalu nunap assingani taamatut allaqqasoq oqaatigisimagaa KEO-p unnerpaa. KEO-p Nunap assingani misissuinermini takusinnaasimanngilaa ilumut Sermitsiap Ersaa-ta allanneqarsimanera ilumullu taamatut ateqavinnersoq uppernarsisimanagu.

MP: Katersugaasivimmi nunat aqqisa allattorsimaffiat misissuiffigisinnarluni tullissaani ilumut taama allassimasoqarnersoq saqqummiutissavaa.

CCO: Kalaallit Nunaanni nunat aqqi illoqarfikkaartumik atsersorneqartarput. Nunat aqqinik aalajangiisarneq immikkoortortanut assigiinngitsunut agguarneqarsimavoq, *byzonemik* aammalu *bygdezonemik* taaneqartut tassalu kommuneqarfiit ataasiakkaat taakkulu nunaqarfiisa iluiniittut kommuninit aalajangiiffigineqartarput. Nunat illoqarfiit nunaqarfiisalu avataanniittut Nunat Aqqinik Aalajangiisartut atsersortarlugit.

SH: Nunat aqqisa allattorsimani kikkunnit tamanit paasiuminartunngorlugit sularineqarnissaat SH-p siunnersuutigaa.



KEO: Ukiut sisamat ingerlanerini angusassat pingaartillugit anguniarnissaat
KEO-p siunnersuutigaa.

Ataatsimiinnissaq tullegg pissaag apriilip 17-ianni, nal. 15.00.

Carl Chr. Olsen
Siulittaasoq

Pia N. Knudsen
Allatsi

Sign.